

## ROOFDIERE

# Veeverliese wetenskaplik deur NMMU bekryk

Veeverliese weens roofdiere in Suid-Afrika lei na raming tot skade van meer as R1 miljard per jaar. Dit het ingewikkelde maatskaplike, ekonomiese en ekologiese gevolge.

Die Nelson Mandela Metropolitaanse Universiteit (NMMU) ontleed tans veeverliese weens roofdiere in Suid-Afrika deur die sentrum vir bewaringsekologie in Afrika. Ongeveer R2,5 miljoen is vir die ondersoek beskikbaar gestel. Die proses, bekend as PredSA, het verlede Mei begin en dit sal na verwagting 18 tot 24 maande duur om te voltooi. Die Departement van Omgewingsake, die Departement van Landbou, Bosbou en Visserye, Cape Wools en Sybokhaar SA is vennote van die universiteit in dié ondersoek.

## MAATREËLS

Roofdierbestuur het voorheen klem gelê op maniere om die probleemdiere uit 'n spesifieke gebied te verwyder – 'n situasie wat tans voortduur. Nuwe navorsing toon egter dat nie alle roofdiere probleemdiere is nie.

Territoriale, individuele diere kan as 'n katalisator optree om potensiële probleemdiere weg te hou. Die openbare mening teen dodelike maatreëls het toegeneem, terwyl nuwe insig verkry is in die ekologiese uitwerking van sulke maatreëls.

Gevolgtrek is daar 'n verskuiwing van pogings om roofdiere uit te roei na nie-dodelike metodes om veeverliese te verminder, asook in die benadering om slegs individuele probleemdiere te verwyder. Dié maatreëls, die doeltreffendheid daarvan en neigings in die toepassing daarvan word ontleed en in 'n beleidsraamwerk vervat.

## BELEID

Plaaslike gemeenskappe, wildbewaarders, ekotoeriste en boere het botsende belange. Verskillende morele verpligtings kan tot konflik lei, soos mense se verpligtinge teenoor mekaar en teenoor ander spesies of die omgewing as 'n geheel tot botsings lei.

Dit is 'n groot dilemma vir beleidmakers. In sulke gevalle is dit die beste om al die etiese verpligtinge en die mededingende belange sorgvuldig te balanseer en met benaderingsvriende te kom wat die beste uitkomst vir al die betrokke belanghebbendes het. Dié oogmerk kan egter nie bereik word as die mees tersaaklike inligting nie beskikbaar is nie. As

die beleidmakers al die betrokke inligting en standpunte tot hul beskikking het, sal hulle die beste beleid kan vasstel.

PredSA gee ook aan mense met botsende standpunte oor die bestuur van roofdiere die geleentheid om kennis te neem van alternatiewe perspektiewe en die breër implikasies van bestuursbenaderings te verstaan.

## VEE-AANVALLE

Vee word breedweg gedefinieer as huishoudelike diere en wild (eersgenoemde sluit pluimvee uit en laasgenoemde sluit volstruise in) wat bestuur word vir kommersiële doeleindes of menslike belang in vrylopende toestande. Dié toestande maak hulle kwesbaar vir roofdiere.

Die konflik tussen veeboere en roofdiere en

die pogings om dit te bestuur, is al eeue lank deel van Suid-Afrikaanse boere se bestaan. Die belangrikste gevolge daarvan is die uitwissing van die meeste van die toproofdiere in Suid-Afrika.

Rooijakkalse (*Canis mesomelas*) en rooi-katte (*Caracal caracal*) is die belangrikste roofdiere van vee in die land. Daarom laat PredSA veral die kollig val op die spesifieke biologiese en ekologiese aspekte van dié twee wildsoorte. 'n Magdom ander diere word ook by veeverliese in Suid-Afrika betrek, waaronder leeu (*Panthera leo*), luiperds (*Panthera pardus*), jagluiperds (*Acinonyx jubatus*), die Kaapse vos (*Vulpes chama*), wildehonde (*Lycan caon pictus*), rondloperhonde (*Canis lupus familiaris*), witkwasjakkalse (*Canis adustus*), gevlekte hiënas (*Crocuta crocuta*), strandjutte (*Hyaena brunnea*), tierboskatte (*Leptailurus serval*), bobbejane (*Papio ursinus*), ratels (*Melivora capensis*), bosvarke (*Potamochoerus larvatus*), krokodille (*Crocodylus niloticus*) en talle roofvoëls.

Die erns van die betrokke diere as probleemdiere sal geëvalueer word. Die ekologie en gedragspatrone van die belangrikste roofdiere sal onder oë geneem word en daar sal bepaal word hoe dit die wisselwerking met vee beïnvloed.

PredSA sal ook bepaal watter faktore 'n rol in veeverliese weens roofdiere speel.

## CHOLESTEROL

# Diervet dalk nie só sleg, toon navorsing

Die waarheid van die algemene siening dat plantvet "gesonde vet" is, terwyl dié van diere sleg is, is nie so seker as wat baie mense dink nie. Die onverwerkte bevindings van 'n navorsingstudie van byna 50 jaar gelede het onlangs in die mediese joernaal *BMJ* verskyn. Daarin skryf dr. Lenner Veerman, senior navorser aan die Universiteit van Queensland in Australië, dat alles wat mense oor die poli-onversadigde vet in groente en die versadigde vet in diere glo, kan in der waarheid 'n leuen wees.

Die voorheen onbekende bevindings kom van die grootste studie in sy soort. Dit is van 1968 tot 1972 in Minnesota, Amerika, gedoen en 9 423 mense het daaraan deelgeneem. Dit is onderneem om die opvatting te toets dat die poli-onversadigde vette in groenteprodukte op lang termyn gesonder is as die versadigde vette in vleis, room en botter.

Net 'n enkele verslag oor die navorsingsprojek is in 1989 uitgereik. Daardie verslag het die vraag probeer beantwoord of groen-

tevette die risiko van hartsiektes kan verlaag. Die verslag het nooit aangedui of diervette eintlik gesonder vir die hart kan wees as poli-onversadigde vette nie.

Veerman, wat sedertdien oorlede is, was grootliks vir die navorsing verantwoordelik. Sy kinders het onlangs van die onverwerkte inligting in 'n kelder gevind. Daarin het die navorser bevind dat die deelnemers tussen die ouderdom van 20 en 97 jaar se cholesterolvlakke met gemiddeld 14% verlaag het nadat hulle plantvete met diervete vervang het.

Die navorsingstudie was nie sonder foute nie. Dit het onder meer nie aandag gegee aan die verskillende siektes of kankers wat veroorsaak kan word as sekere soorte vet ingeneem word nie.

Dit bly egter een van die grootste navorsingsprojekte tot dusver en weerspreek die opvatting dat plantvet minder geneig sal wees om are te verstop en hartaanvalle te veroorsaak as die versadigde vette wat in diere voorkom.



## HIERDIE BLAD IS DEUR DIE RPO GEBORG.

BERIGTE IS DEUR DIE RPO GESKRYF EN VERSKAF. RIG NAVRAE AAN DIE RPO BY TEL. 012 349 1102. E-POS: [rpo@lantic.net](mailto:rpo@lantic.net). WEBWERF: [www.rpo.co.za](http://www.rpo.co.za).